

行唐縣新志卷之十四

目錄

藝文志上

記

碑

辨

說

墓表



行唐縣新志卷之十四

藝文志

論曰郡邑之有藝文上下古今不拘時代網羅一方之著作彙而存之爲藝苑徵文考信也行唐舊志藝文自漢以下無徵焉存者自元始其人亦不盡工文章顧余不惟其文惟其意吾鄉陸清獻公輯靈壽志風雲月露之詞不載其有關於學術政治者則亟收之希風前哲竊以此爲持擇之衡公

餘著述苟有裨於民者並付剞劂雖言之無文庶
幾不同於風雲月露之詞夸目而尙奢者矣作藝

文志

藝文志上

修學記


元文

王若虛

庠序之設非獨王者之事也良守令下車之始恒以此爲先務焉國家承平以來文治聿興下至僻邑莫不有學崇儒重道不可謂不至而有司或不能推其意往往安於苟簡名在實亡蓋有廢墜而不修者矣尙何望其興起人心而爲勸哉行唐爲畿南名地學者視他邑爲多而學舍狹陋不足以彰教化大定己巳張君國綱爲

主簿之半年力圖完葺謀諸士之好事者相與悉力赴之物不促而辦役不督而勤二旬功成爲屋凡三十間創建者三之一於是缺者全敗者堅漫滅者鮮講集之室棲息之舍庖廚庫廡以至井亭碑樓莫不畢具廟貌肅然禮器整潔杏壇槐市次第可觀門墉崇峻煥然華麗學者益感發奮起公親爲訓迪而獎勵之其用心亦已勤矣嗚呼以邑多士克襄勝舉而又得張君爲之倡人才何患不成風俗何患不厚他日化行俗美一變而

爲鄉魯之鄉則是役也豈徒爲觀美以誇末俗哉諸生
彭起年來請予記乃爲志其大略云



廉訪使關公愛民碑記

鄧 樞

廉訪之職宣上德通下情爲朝廷耳目之官然士大夫
僭爵受祿明是非識利害能體國愛民開誠布公澤被
天下者有幾人哉恒陽關公思義學術正大器識宏遠
忠忱義概凜然在人歲己酉南臺御史奉命按郡縣
和顧和買事計物力時值如數給賜邦人感激事畢以
養母乞歸辛卯起遼陽別駕沿政有聲秩滿歸養會朝
廷以吏習積玩遴選正人路置行臺以防飾詐除江東

道廉訪使計日就道慨然有澄清之志江淮莫不知名以母憂歸里一日訪父老有鹽折稈草初繫雄易二州食用寶坻鹽貨之家折納和顧和買雜派並行科撥折納車輛載裝日久費多寶坻運鹽情弊多端或遇捕獲枉遭刑憲公體訪得實謂於民不便於鹽法有壞定賦納總稅結皆止五百里內援古証今白上官請郡縣戶役蠲免民受其賜公遺愛及鄉邦知無不言言必有中邦人愈感激請勒石以誌不朽

主簿劉公遺愛碑記

程淵

主簿劉公敬賢以至正元年八月由益津調行唐後三年行臺薦擢爲大農掾公志剛介性明決有害必除有犯必罰村民胡義鬻田與豪戶蔣肅不給值公追給之邑有牙郎媒妁歲納鈔三十餘貫公曰牙媒雖便民納錢於官不可也出榜免市錢壬午秋邑大饑野有餓莩民採木葉以食公申請得白米七百餘石賑饑民生活者衆癸未冬民愈乏食餓莩尤甚公將饑民所食樹皮

上訴政府拒之愈嚴請之愈切政府諒其誠得鈔肆萬
伍千貫以濟貧民民免死者半予維古選令甚於簿令
爲邑長教化得專其權刑罰得施其柄治之得失民之
利害繫焉簿佐令者也簿所欲爲令或不從非積誠以
動之則不可以有爲今公之膏澤及民雖令之有容抑
亦誠所感也惜乎保障未久而公已去其辨民之曲直
救民之凶荒不向於利不憚其勞使弱者立强者伏欲
散者聚將死者甦則其明斷保惠爲何如耶明道先生

曰一命之士存心於愛物於人有濟宜乎行之民思其德而不忘也邑人程淵記之爲之銘曰聖人勤民立之司牧惟令與簿給求養欲簿實佐貳治匪得專積誠事令奉以周旋偉哉劉公抑強扶弱饑者食之免轉於壑深恩厚澤民不能忘勒諸貞珉百世流芳

孝子卻祥墓碣

馬利用

行唐在春秋爲晉邑晉大夫卻穀居之孝子祥其苗裔也高祖泰曾祖廣爲左輔監軍大父溫進義校尉獲鹿縣尹父仲璋監副宣課累世簪纓爲行唐望族孝子幼穎悟旣長嗜學不爲章句於書史能通大義丰儀秀整體幹雄偉議論辨析出人意表性甘稼穡不樂榮進或勸之仕薦以保障總監州課非其志也後又司通州倉積歲餘無圭合之短始終十五年小心愼密未嘗有過

至大己酉冬調博野縣宣課提領未之官馳歸覲省時
父病親嘗藥餌衣不解帶日夜憂感願以身代父歿以
禮葬於甘泉鄉承澤里治喪不尙緇黃朝夕祭奠擗踊
盡哀鄉閭稱孝旣葬廬於墓側寢苦枕塊晝夜悲號感
動路人哀毀骨立遂以不起生平事親以孝友弟以仁
交友以信睦族以義勤慎以居官正身以齊家身雖歿
而名不朽猶不死也弟禧授將仕佐郎錦州判官請予
傳之乃繫之以銘曰公之在世德全性純屢屈米鹽出

納維均將期戲綵以晨以昏胡天不弔遽奪其親淚洒
湧泉號泣蒼旻塚廬攀栢過客酸辛孝慕不已長夜無
春孝乎惟孝光耀貞珉